

# Gui'ch wrup wfua' Juan

¡Diux, Dios gunley tu!

**1** <sup>1</sup> La' men gol re, rka' gui'ch re, la'n rxa'lu lo tu yrati' tu zik rkalsa tu wa rka'lo tu Jesús. Dios wbe tu, wbedx men tu la' tu ngab xniaz men.

Tib tib tu, nlepa' rkani'n tu. No ni nakdow non nati', sinque no yrari' men rumbe'yli didxnle, yra men rkan men tu.

<sup>2</sup> Rkan no tu, porque titi' nak di'dx nle rneladx ba, ni chudiga' dxe ysa'n baw.

<sup>3</sup> Rnabi'n lo Dios, zikti' men, zikti' Jesús, men nak Xpë'd men, tige'k yliu' men xguilbuen men lo ba, tige'k yjalistio' men ba, ytixte men guilriu, ytixte men guilrdxe'b lo ba. Gakno men ba, tige'k ndxi'ch su ba lo Xti'dx men, tige'k yjan ba yra men nakyra ba.

<sup>4</sup> No nlepa' rxildi'n bes, woni'n la' pa lal men nakyra tu wa, riu men mben men zik nakpa' di'dx nle, zik rxo'dx Dios men nak Xuz ba.

<sup>5</sup> Compañer men rneladx Jesús, golbin gan tu: Rnabpa'n lo tu, tib tib ba, niupa' yjan ba yra men nakyra ba. Guiebdi tu tib go'n nkuib nane rnabi'n lo tu, sinque la'w nak go'n won ba haxta hor wslo wneladx ba Jesús. <sup>6</sup> No par ylu' nlepa' rla'n ba Dios,

niupa' yben ba zik r̄xo'dx men. Go'n kien nak, nki'npa' guiu ba yjan ba yra men nakyra ba, porque go'n re nak go'n r̄xo'dx men. Hor wslo wneladx tu Jesús, go'n kua nak won tu.

<sup>7</sup> La'n rne go'n re lo tu, porque ndal men karkade kan-xo'n, karunse'd men miech go'n nakdi di'dxnle. Rneladxdi men nle wak Jesús zik tib miech hor wdxid men lo guixyu. Karkade men miech nan nga, la' men kien nak men niu' encontr Jesús. <sup>8</sup> ¡Nses golsu lo men! Porque, chil la' men yjade tu, slu'x dxi'n go'n wla ba. Tiga'k golbiu yga tu yrati' guilnzak go'n niu' yguied Dios lo tu.

<sup>9</sup> Men rslo runze'd go'n riab guik men, rsa'n men go'n nakpa' xiwse'd Jesús, mben-nodir men Dios. Per men tiga'k zanka dxich xiwse'd Jesús, men kien nak men mben-no Dios, ni mben-no Jesús, men nak Xpë'd men. <sup>10</sup> Nga nak, men ydxi'd lo tu wa, chil ze'dne'di men xiwse'd Jesús, yjaniadi tu men. Te'd-di tu lidx tu kuez men, nilal no yxildi tu yuwi' tu men. <sup>11</sup> Golbien gan tu, men yxil yuwi' men, ruka rakyra men men lo xguilmal men na nga.

<sup>12</sup> Niu' ndalri' go'n rlati'n ynen lo tu. Per rladiti' ynenaw ne lo gui'ch re. Rlati'n xali'n guial wa, guialwin gan ku tu, gan xan rak tu, xali'n yxuxti'dx no tu, dxe skua, zikti' tu, ziktiga' na chuguilr̄xil ba yra ba.

<sup>13</sup> Yra compañer men rkalza niaz re, men wbe Dios, wbedx men men zik wbedxga'k men tu, rla'n men gakanan tu rkan men tu.